

Zakon o visokom obrazovanju mora biti usvojen



Delegacija Evropske komisije u Bosni i Hercegovini, Vijeće Evrope i Ured visokog predstavnika odnosno specijalnog predstavnika Evropske unije apeluju na članove Ustavno-pravne komisije Zastupničkog doma BiH da na sutrašnjoj sjednici podrže državni Zakon o visokom obrazovanju.

Davanjem podrške ovom nacrtu, što bi istovremeno značilo i njegovo vraćanje u parlamentarnu proceduru, pomogli bi da se osigura skoro usvajanje ovog zakona, sa čijim se donošenjem već odavno kasni. Ovaj zakon je od suštinske važnosti kako bi se obezbijedio odgovarajući zakonski okvir za ispunjenje bosanskohercegovačkih obaveza iz tzv. bolonjskog procesa i Lisabonske konvencije, koji zajedno čine osnovu za zajednički evropski prostor visokog obrazovanja. Štaviše, usvajanje Zakona o visokom obrazovanju na državnom nivou predstavlja obavezu koju je BiH preuzela u okviru Evropskog partnerstva u koje je ušla sa Evropskom komisijom. Nacrt zakona je u skladu sa bolonjskim principima i počiva na najboljoj evropskoj praksi.

Donošenje tog zakona istovremeno bi poslalo pozitivan signal evropskim partnerima Bosne i Hercegovine prije sljedećeg ministarskog sastanka u okviru bolonjskog procesa, za koji je planirano da se održi u maju ove godine u Londonu. Druge zemlje potpisnice već odavno čekaju da BiH ispuni svoje obaveze. Što je još važnije, odavno čekaju i studenti, akademski radnici i građani ove zemlje. Oni imaju svako pravo da od svojih izabranih predstavnika očekuju da nadoknade izgubljeno vrijeme.